

元代文集

一一

元代史料叢刊編委會

主編

元
代

史料
叢刊
編
續

泰山書社

元代文集

一一

元代史料叢刊編委會 主編

元代史料叢刊續編

黃山書社

滋溪文彙卷第十五

碑誌九

元故武義將郎漳州新軍萬戶府副萬戶趙公神道碑

銘并序

公姓趙氏諱伯成眞定人也考府君偉國初以才勇從丞相
史忠武王平金耀里軍百戶歲庚申公始襲職隸萬戶邸公
麾下移兵戍守歸德己未從邸公濟江攻鄂中統三年李璿
反公與賊戰有功邸公旌幣三端改隸招討使野德迷失麾下
別將拔都軍百人至元十有一年天兵渡江從攻沙陽新
城陽羅堡因戍黃州進攻隆興撫州建昌皆下之十三年宋
亡宋臣陳宜中張世傑挾益衛兩王走閩海表年官人圖復

宋其下倡亂從之閩大擾公從招討使攻建寧降之行省署
公建寧安撫司達魯花赤是時守禦未備有盜萬餘起南劍
來犯建寧柵郡西河上公隔水而陣一矢射死賊首眾鼓勇
進凡數十戰斬首不可級計血流於河水爲之赤生禽數百
人獲鎧仗無算省錄其功復署公建寧路軍民達魯花赤明
年政和慶元民亂公討平之吳聖公倡浦城人爲亂公勦除
其眾左副元帥高某薦之復以公兼權建寧路萬戶於是招
募士兵千人教之擊射皆號精兵盜聞公威名或斂避不敢
犯民亦少獲其休息焉朝廷嘉之特賜金符制授武略將軍
管軍千戶公益奮激思自效十七年春柳昌民杜萬一挾左
道媚人表僭名號構亂一方公偕方安撫生禽萬一磔龍興

市賞公白金五十兩復以管軍萬戶守建寧十八年制授管軍總管進階武義將軍是年秋漳州高安賊作樹柵以爲固公命作雲梯先登攻破其柵禽之二十年冬黃華賊起公引兵覘之抵范墩與賊遇敗之又抵甌寧之黃屯與賊遇又敗之斬首不知其數餘皆敗走復屯甌寧之板橋公又敗之未幾賊號二十萬復來分據建寧四面以示必取公潛出兵水南賊發矢如雨下公不爲動乃泅水以濟諸軍從之大呼殺獲無算賊披靡遁公追殺之且行且戰三十餘里僵屍藉藉被山野又捕虜數百人時黃華餘黨散在政和之青州及獅子巖者公皆破之賊患遂息行省檄公守松溪政和兩縣二十四年移南劍是秋尤溪賊作公又平之招諭民之脅從者

俾居其鄉乃還鎮是冬鍾明亮兵起公偕福州路達魯花赤脫懽捕之轉攻南劍及邵武諸道皆大破之平章拜除表公前後戰伐以聞制可其請超拜漳州新軍萬戶府副萬戶二十六年冬平寧化黃土石門等柵二十八年省府以漳之龍巖羣盜之所出入移公守之乃招諭賊魁謝大老等來歸二十九年漳浦賊作公從樞府臣破之復留公守雲霄隘於是招諭曾小虛歸化而曾大虛負險不出公復以兵臨之大虛亦降其餘黨尙爲民患公提勁兵揉之省臣以南詔之地控制循梅潮廣諸郡檄公鎮之仍總雲霄之兵凡二年盜不敢犯民甚安之大德初元劇賊劉大老犯漳州境公將兵迎戰刀中公頂及腰猶與賊戰不已於時公年六十七矣遂移疾

北歸行省不允公復以爲請久之方聽其去至大二年正月
十有九日卒於家享年七十有七葬真定縣新市邨別駕莊
之西原公貌魁梧力能兼人平生大小蓋百餘戰身被十餘
創其勞勩何如也初公至閩閩人卽降同列建議請計口徵
銀爲贄禮號令嚴急民大驚恐公榜通衢立罷其事合郡歡
聲如雷呼公爲佛建議者暴死民大稱快公綏緝新附簡易
寬厚民以爲便立祠祠公迄今不輟嗚呼昔者王師伐宋曾
未數年降其君臣墟其廟社已而遺民在在蠶起何其取之
之易安之之難若是歟余讀周書每歎周人滅殷之易安殷
民之難也大抵古今人情不甚相遠益知書之爲可盡信公
母高氏夫人常氏如夫人者七子男四人仲立德明寧老仲

卷之十五

信女三人長適眞定劉某次適建寧謝某幼爲比丘尼孫男
十人成立君佐君澤君弼君哲君傑君和君讓君祥君瑞曾
孫男二人眞保關保公歸元子仲立嗣仲立卒弟德明嗣德
明卒仲立之子成立嗣成立卒令其子眞保嗣焉天爵與公
同里少嘗拜公酒酣耳熱語其生平戰攻之勞英氣凜凜眞
一世豪傑之士哉銘曰

南北分裂

世祖荒之滔滔江漢一葦杭之宋社旣墟頑民胥動借曰余
復交刃以閩荷矜爲兵裂裳爲旗動萬爲羣以殺爲嬉公往
兵之小大百戰殲厥渠魁執俘以獻惟昔閩越文物皇皇何
於斯時大肆厥狂蓋有所恃地險而遠新造之邦未洽國典

慨彼昏瞶以干大刑幾三十年嶺海始寧維公虎臣多著勞
勤身犯矢石出入瘴癘

天子錫命副長萬夫傳子及孫世功弗渝白髮來歸優游隴
畝語其生平猶見材武惟公之墓滋水之陽刻詩貞石威名
日揚

元故奉議大夫國子司業贈翰林直學士追封范陽郡
侯衛吾公神道碑銘

世祖皇帝臨御中國思建百度以興文治至元六年乃命國
師肇造新字頒布天下京師建國子學以教胄子外則州郡
並置校官以教民之俊秀者又置提舉學校官以總之初以
制敕符印改用新字於是國家言語文字盛行於時而國師

之功固不細矣當是時左右國師以成其功者公之考文書
奴其一也新字既成遂由翰林應奉文字超拜直學士久之
仍以學士出爲提舉湖廣學校官召歸京師卒二子長曰護
林中順大夫監漢陽府次卽公也諱野先少敏悟世其父業
年二十擢爲國子教授諸生翕然信服不敢以少年易之歲
滿乃遷助教又遷博士爲博士凡三考遂遷監丞又拜司業
累官奉議大夫公性謹厚其於教人孜孜不怠作成人材居
多嘗考古先聖賢行事及歷代君臣可監戒者譯以國言傳
諸學徒故諸生服公之訓人人卓然自奮思立事功非但誦
習其空言而已公又依倣成均之制定爲學規下至米鹽筆
札亦皆出納有發其所譯潤諸書人爭傳之學國言者以得

公師爲榮至大間

武宗皇帝親擇貴臣子孫數十人俾從公游

仁宗皇帝方興學眷公尤深嘗曰此人極有學守不可使離
監學公亦泊然守職不變不退蓋自教授累至司業幾三十
年未嘗別遷他官一時臺閣名鄉碩輔往往皆其子弟或欲
援公居要官者輒力辭曰是有命焉不可幸而取也舊制司
業班列五品以公故特升四品方欲進爲祭酒而公不幸病
卒矣得年四十有七

仁宗深悼惜之累贈翰林直學士大中大夫輕車都尉范陽
郡侯其子赫赫少傳家學知名公卿間出監解之聞喜黃之黃
陂皆有惠政入翰林爲修撰拜授經郎兼經筵譯文官擢拜

陝西江南兩臺御史言事切直劾罷權貴數人歷僉江東湖南肅政廉訪司事進拜海北廣東兩道副使按行郡縣風采肅然今官大中大夫湖廣行中書省左右司郎中嗚呼國家自建元以來號稱治平迄今七十餘年矣京師公侯大家富貴赫赫而興替消長於歲時旬月閒者何可勝數而公父子三世獨以文雅清慎相繼顯聞不亦盛乎公曾大父以上世仕高昌自其考始入中國遂家京師母八撒納追封范陽郡君公配也先的斤繼入刺的斤俱追封范陽郡夫人子男一人赫赫也女三人適侍正府知印達禮馬河東廉訪副使教化河南行省都事柏柱孫男一人曰保堅女二人幼公以延祐六年六月二十三日卒以先塋地隘權殯都城西佛寺元

統元年十月庚午葬宛平縣香山鄉七園里銘曰

皇有中夏百度繼作人文昭宣臣民允若乃興庠序敷揚國
言公爲之師丕衍其傳有來貴游執業抑抑羣材斯興以贊
皇國公居函丈三紀如初佩服古訓衣冠舒舒咨爾國人榮
達滾滾文字之澤獨克悠遠公又有子家學是承歷游清華
令譽日升思美公度式表貞刻尙其來裔是效是則

亞中大夫山東道宣慰副使致仕張公墓志銘

公姓張氏諱克忠字彥直至元中由東宮宿衛出爲蠡州判
官擢遼陽行省都事入爲宗正府員外郎以親老乞歸養久
之調廣平永年令歷明州信州路推官遷知吉州事再遷知
州以年老遂致仕卽拜山東道宣慰副使累階亞中大夫泰

定三年九月九日終於家年七十五公爲人惇厚篤實遇事果於有爲初佐蠡州歲饑民起爲盜公出米爲糜以食餓者於是吏民以公故相繼出米所活數千人盜亦衰止諸王叛東土詔遣大臣部諸將兵討之公時居遼陽幕總督軍餉無少闕居民流亡失業者公撫緝完復東土以寧永年地號沃壤公下車召其耆老語之曰治民之道在乎敦耕桑崇庠序廣儲蓄而已農桑勸則無寒飢之苦學校興則知禮讓之方儲蓄廣則無水旱之虞矣在縣三年以治稱信屬縣玉山誣民僞造楮幣獄具矣公疑而辨之民得不死繪公像事之終身延祐丙辰關中猝有變聲連河東吉在窮絕山谷聞民乘閒欲爲盜公下令禁止盜竟不發旁州官屬爲不法者憲司

檄公往治之而訟獄積歲不能決者亦以屬公皆決治如法
吏民畏服公所至大興學宮延師儒以教化爲本擇良民子
弟開敏者補諸生爲除其繇役以故民學者眾而風俗亦或
少變焉和州歲旱公出禱輒雨歲則大穰乃繕治州之廨舍
及神宇所當祠者財用甚省而堅完可久和人縫掖耆艾偉
公治行以狀薦於部使者部使者以其狀聞於朝而公年已
七十矣曾祖諱廣伯祖諱仁仕於金考諱璧皇贈奉議大夫
知趙州事驍騎尉高邑縣子妣王氏贈高邑縣君妻楊氏封
高邑縣君子男二人蚤從仕郎籍田署丞次某張氏世家中
山葬新樂縣儀臺原自公祖以下始葬安喜縣竟坊原公之
卒也從葬堯坊之兆公初以材敏侍東宮一時宮臣後多貴

顯至大官獨公出治州縣計資而升未嘗肯妄進取入官五十餘年而歸老焉其廉退有足嘉者故爲之銘銘曰

張望中山考厥世炎漢北平文侯裔烈烈行成輔唐帝華胄相承尙克系溫和州廉以勵秉旄懷紱號良吏至今郡邑有遺惠懸車來歸宛其逝圖銘玄石識幽竊更千百年庶無替

故奉政大夫遼陽行省郎中黃公神道碑銘

延祐四年六月吏部主事黃公肯播擢拜監察御史時丞相鐵木迭兒以受賕得罪匿興聖近侍家有司不得窮治其事皆相顧無可奈何公視事謂同列曰丞相受賕之罪固所當治然其罪之大者盍悉陳之卽率同列言丞相違

世祖制括地江南致汀漳民叛陰奪阿撒罕太師官致關陝弗寧降諸王監郡監縣致宗親不睦增江淮鹽課地稅致黎民固窮引用貪邪小人致朝廷政亂臺臣以聞 天子震怒命罷相政事黜其門下用事者若干人由是公之聲名暴著中外而小人怨恨思害之矣明年春詔御史長哥偕公巡行上都覈實吏贖先時上命建佛寺於雲州七峰山以太府丞大都監制大都者平章某私人也 上所賜軍匠金帛大都及總軍官悉分取之軍將訴於御史臺至是就命公等鞠之辭連平章及其兄某二人方近倖寵任權勢赫然入言於上以公等不思奉詔覈實吏贖乃敢沮格修治佛寺 上性慈仁奉釋教惟謹以其言爲誠然卽遣使召公等至京師止宮